



elternplanet.ch

Samichlause Värslì

Ds FÜRli knischeret im Ofè
ds Ührli tigget liis
I der Stube schmöckts nach Öpfu
und nach Tannechrys

Ds Lämpli lüchtet häll verusse
Ufe Glitzerschnee
Und am Waldrand obe güggsled
D Eichhörndli und d Reh

Liisli geit der Chlous dÜR d Tanne
D Sterndli halte Wacht
Wo witem ghört me scho sis Glöggli
häll dÜR d Winternacht



Du, Samichlous, säg, isch das wahr
Dass du eleni wonsch ds ganze Jahr?
Ich finde sone alte Maa
Müesst Fründe um sech ume ha
Chumm doch und won i üsem Huus
Das miech de andere gloub nüüt us.
Mir würde für di choche, bette
Butze, wösche, suuge, glette
Würde hälfe Guetzli bache
Schoggi schmelze, Seckli mache
Nussböim hei mer viel dehei
Nume Manderiindli wachse kei..

O dis Eseli dörft da si
Im Gartehuus, mir richtes ii
Und uf em Rase chönnts de weide
Chömed doch zu üs, dir beide
Das isch für öich ganz sicher guet
Wänn öpper für öich Sorge duet
Drum la ders düre Chopf la gah
Und lüüt mer nach der Wiehnacht a !
(Andrew Bond)



Es Liechtli brönnt im Tannewald
Was söll äch das bedüte?
Chunnt äch dr Samichlous scho bald?
I ghöre äs Glöggli lüüte.
Es isch dr Chlous mit schwärem Schritt
Chömed lueged gschwind
Er treit e Sack voll Nüssli mit
Für alli, alli Chind



Es polteret im Stägehuus
Es chlopfed a der Türe,
Wär chunnt so spät no d Strass z dür uf?
Wär wott üs jetzt no störe ?
He, lueg dr Samichlous isch cho!
Er treit e Sack - e schwäre.
Gäll, Samichlous, bisch sicher froh,
dass d ne bi üs chasch lääre



Dr Samichlous luegt z fride dri
Wie chönntis de o anders si
Der schönscht Mantel hett är anne
mit schöne, wisse Pelzli dranne

Er stampfet gmüetlech dür e Schnee
da steit es Häсли, dert es Reh
Und ds Eseli louft so schnäll es cha
üsem liebe Samichlous vora
Schneeflöcklil gheie weich und zart
Em Samichlous grad i si Bart
Di erschte Hüser si nümmit
s isch Chlousetag, du liebi Zyt!



Samichlouse-Liedli
Was isch das für nes Liechtli
Was isch das für ne Schiin?
Der Chlous mit sim Laterndli louft grad der Wald z dür ii
Sis Eseli hett är glade
Es rüeft I-Aa I-Aa
Hüt darf ig mit mim Meischer, emal ids Stedtli gah
Im Sack da hetts viel Nüssli
Und Schoggi, Zimetstärn
Die trag ig, wärs e Zäntner
Für d Chinder no so gärn



Samichlous i hane Frag
Säg, was machsch du jede Tag?
Flügsch im Summer o dervo

Ufene Insle irgendwo?
Ligsch mit de Badhose am Strand
und hesch e Glacé i der Hand?
Geisch ga fische mit dim Bart
Oder machsch e Stadtrundfahrt?
Oder blibsch du gern dehei
I dim Wald so ganz allei?
Höcklich gmüetlech vor dim Huss
Sägmers, i lache di bestimmt nid us?



Samichlaus, i bin so froh,
Dass du hüt zu mir bisch cho,
Du weisch, ich due gärn Nüssli ässe,
Hesch mis Seckli nid vergässe?



Vo witem ghört mes glöggele
Wär chunnt äch da cho z töggele?
S isch z chline, graue Eseli
Es suecht im Gras nach Greseli
s stellt d Ohre uf und rüeft: I-Aa
Juhui, der Samichlous isch itze da!



Ich bi en chline Stumpe,
tue gärn chli umegumpe,
ä Lumpeornig mache
mit mine viele Sache.

Tue mängsmol gar nid lose,
ha Fläcke a de Hose,
tue vielmol umestoh
statt weidli hei-zue goh.

Doch darfsch du s Mueti froge,
ich tue keis Tierli ploge.
Drum Chlaus bis so en Guete,
verschon mi vor de Ruete!

Bring doch nur gueti Sache,
wie tätsch du Freud mir mache!
Und gäll, säb weisch sit färn,
i ha mis Mueti gärn!



Samichlaus ich hett en Wunsch
wänn du dänn zu öis hei chunsch
Wett ich mit dir use gaa
und ächli zum Esel stah
wett sin Chopf i'd Arme neh
und em ächli z'Ässe geh



Arme Samichlaus
Wie heschs du sträng.
Gäu di Wäg isch läng,
zu de Ching, de nätte,



elternplanet.ch

wo gärn es Gschänkli hätte.
Säg, längts äch ou für mi,
wenni ganz e liebe bi?



D lüt säge ging ig sig e chlini Muus
Das isch mir glich, ig mache mir nüt drus.
Dr Samichlous fragt däm gwüss nüt dernah,
Er wird mir wäger scho es Päckli ha.



I bin e chline Stumpe,
es säges aui Lüt.
Ig wett so gärn e grosse sii, doch ds strecke das nützt nüt.
Gäu Samichlous das weisch du scho,
chum glich i üses Huus und läär no vor em wiitersgah di sack i d Stube us.



S isch mer gspässig z Muet
Bis du Chlous so guet
Tue nid mit mir schimpfe
Tue nid d Nase rümpfe
Gib mer lieber gueti Sache
Weisch de chani wieder lache

Samichläusli, Samichläusli
chum inä und mach es Kafipäusli
Di Sack isch einewäg vill z schwär
drum ässed mir ne gschider läär



Samichlaus gäu dusse isch es chaut
Und Du bisch ja o scho aut
Läng u wiis si Dini Haar
Trotzdäm chunnsch Du jedes Jahr!
Bringsch üs o gäng viu Sache
Nei, i tue Di nid uslache.
Wenn dr Sack nümme lang masch trage
muesch Di nümme lenger plage
Ohni Sack wirds ringer ga
La ne doch bi üs la stah.



Im Tannwald isch öpis gscheh,
Äs ruuscht und ruuscht immer meh,
Bis dass es jedes Bäumli weiss,
Dr Samichlous geit hüt ufd Reis

Samichlaus im schöne Gwand
Mit em Chrummstab i der Hand,
Du luegsch so lieb, du guete Maa,
dass mir Chind kei Angscht müesse ha.

Gäll du bisch nid bös mit mir,
weisch ich ha chli Angscht vor dir.
Gfolget hani scho nid immer,
gäll das wie mer itz vergässe,
lieber us dim gschänkte Säckli ässe.
Gäll ich darf itz wieder ga,
Samichlaus du liebe Maa.



Oh Samichlaus wi si mir froh,
bisch das Jahr wieder zu üs hei cho,
um hüt mit Dine guete Sache
alli Chinder glücklich z mache.
Mir gsehs a Dine Auge aa,
häsch au es bitzeli Heiweh gha



De Samichlaus, er chunnt, er chunnt.
Er louft mit schwärem Schritt,
er het halt grossi Stiefu a
i dere chalte Zait.
Jetzt han ich sini Glogge ghört,
ig weiss was das bedüetet
wenn's vorne vor em Huus
am Abe e so lüütet.
Du Samichlaus, das isch denn flott,
dass du üs chunnsch cho bsueche,
gäll nächhär dörfe mir scho no
die guete Sache all versueche.

Samichlaus, s isch nid zum Lache
Gärn tue ig o mal Blödsinn mache
Bring mer trotzäm feini Sache,
de chan mis Härzli wider lache!



Samichlaus i freue mi so,
dass du hüt verbii bisch cho
Du hesch sicher müedi Füess
Säg am Eseli liebi Grüess.



Samichlaus wi bini froh,
dass du o zu mir bisch cho
Dass du mir mit vielnä Sache
ganz a grossi Freud duesch mache



Samichlous ig bi no chli
mit mir muesch eifach zfride si

Äs Liechtli chunnt dr Fäldwäg i,
i gloub das muess dr Samichlous si.
Jetzt ghört me ds Glöggli, still los guet, wis über d' Wiese lüte duet.
Mis Härzli chlopfet liis und fest,
i hoffe du weisch vo mir o nume ds Bescht.
Di andere chline dumme Sache
wett i ds nächscht Jahr besser mache
Drum bitte lueg i Sack jetzt dri,
öb öppis hesch für mi derbi



Samichlous du Superman
Ilg bi leider Schmutzli-Fan.



Eseli Eseli Hoppsassa
Zieh am Chlaus dr Schlitte nah
Dr Wald dsdürab und s'Dörfli ii
Hesch dr Schmutzli o derbi?
Ds grosse Buech mit Gschichte drin
Ob ächt d'Chinder brav gsi sind
Itz hoffi, dass äs Gschänkli git
Weisch Samichlaus ich muess scho glii is Bett

